

編號 1 號

【野蓮鳥】李宜諭原作

熱天个美濃湖，湖面就像大大个鏡仔，日頭下發光个水波瞞 啊瞞仔，鏡仔裡背有層層疊疊个岫崗、青柳柳个樹仔，還有闊闊 个天、白白个雲……。這個時節，一陣野蓮鳥低低个飛過湖面。

熱天係野蓮鳥个繁殖時期，佢等會變啊特別靚哦！該鳥毛蓋打眼，全身有一跡一跡金黃色、咖啡色、白色同烏色个色神。厥腳長送長送^①、腳趾長長細細支，蓋好在浮啊水面个葉仔項行路，故所，在濫田大概都會看著佢等个身影。野蓮鳥个本名安到「水雉」，因為佢等行路个樣式蓋優雅，長長个尾還會攞啊攞仔，實在靚，故所，大家也會喊佢等「凌波仙子」。

在水陸交接个濫田會有蓋多野生个動物同植物。尤其有兜罕得看著个野生鳥仔、鴨仔、雁仔，佢等愛生養下一代，定著愛在濫田項，故所，又有人同濫田講係「鳥仔樂園」；佢還係地球个腰仔喲，有一等強个生態淨化功能！毋過，這下濫田都漸漸仔毋見核也，再來田坵个用藥忒傷重，故所，蓋

多生態都破壞了了，盡多鳥仔、蟲仔、蚬仔都死淨淨，甚至絕種也，水雉也面臨共樣个命運。

恁多年來，保育團體同美濃湖个野蓮農共下營造友善生態環境，餵來水雉在這做寶生養下一代，漸漸仔野蓮田就有也多樣个自然生態，水雉也換名安到「野蓮鳥」，變做美濃湖个觀光特色之一。本成野蓮農蓋惱水鳥仔，因為每擺種啊著个野蓮苗毋曾生根，水鳥仔就會來啄，啄死也就愛補種，加人盡無閒，野蓮農就會想辦法同佢等逐走。還過野蓮仔種下去 50 日邊仔，葉仔過揀實健壯也，水雉就會在葉仔頂項做寶，毋過，20 日過後野蓮仔就愛收成也，恁堵好又也係水雉愛生春孵子个時節，仰結煞正好？野蓮仔無去採收，就會忒老賣毋出去，毋過，係去採收，水雉就無法度孵子。

好得有農民願意退一步，野蓮鳥孵卵个地方就莫去採收，留分野蓮鳥孵子繁殖。就恁呢，營造也一個友善環境分野蓮鳥生活，這下美濃湖裡背个生態就緊來緊豐富也。

①長送長送：音 congㄨ sung congㄨ sung；喻修長。